

COMUNIDAD CONCIENTIZA RIBA IMPORTANCIA DI MUSEO ARQUEOLOGICO

ORANJESTAD (AAN): Cu hopi agrado DIARIO a ricibi e comentario di e hoben Geologo Arubiano Vivi Ruiz, kende a comenta na redaccion cu hopi yamada a drenta Museo Arqueologico ayera, di hende di comunidad cu kier a bay mira di acerca e obhetonan encontra durante e ultimo excavacion na Santa Cruz.

Aunque a worde splica na e personanan cu a yama cu e obhetonan no ta den exposicion y cu no ta trata di articulonan grandi ni di oro, pero mas tanto di cos chiquito traha na klei y algun piedra semiprecioso, e.o. e interesa-donan a pidi pa nan mira e obhetonan di acerca, y conoce un tiki riba nan origen.

Tambe comunidad ta mostrando interes riba e condicionnan di e edificio y a expresa e deseo pa e prob-

lema aki worde soluciona ya cu ta Aruba su riqueza historico mester resguarda manera un joya precioso.

DIARIO ta mira cu satisfaccion cu nos esfuerzo di a bay wak e delaster excavacion, cu nos interes pa cu Museo Arqueologico y nos articulonan, ta colabora pa simbra e simia di concientizacion den varios persona di nos comunidad. Tur trabao periodistico cu ta duna fruto por worde considerado como un servicio na pueblo, y DIARIO sigur tey pa sirbi pueblo.

DIARIO lo sigui estimula e trahadornan di nos museo, y lo sigui trese dilanti cu e mester bira un monumento nacional manera ta e caso na tur pais di mundo, unda un museo ta ser considera como e di mas halto valor cultural na mayoria pais conciente di e identidad di nan hendenan.